

ՀԱՅՈՑ ԵՂԵՌՆԸ  
ՀԱՅՆՐԻԽ ՖԻՐԲՅՈՒԽԵՐԻ ՎԵՐԼՈՒԾՄԱՍԲ

ՎԱՐԴԳԵՍ ՄԻՔԱՅԵԼՅԱՆ

Հազիվ թե օտարազգի մեկ ուրիշ հեղինակ 1915 թվականի Հայոց ցեղասպանության անցքերը այնպես համակողմանի, և որ գլխավորն է, ճշմարիտ ու համապարփակ վերլուծած լինի, ինչպես Հ. Ֆիրբյուխերը (1893-1939): Ասածը մանավանդ վերաբերում է երիտթուրքերին, պանգերմանիստներին և կայզերական կառավարությանը հասցեագրած նրա հատուկ, ջախջախիչ և անվիճահարույց մեղադրանքներին՝ հիմնված պացիֆիստ-հրապարակախոս գործչի անառարկելի փաստարկումների և ականատեսի անժխտելի վկայությունների վրա:



Հայոց ցեղասպանության կազմակերպիչներին և իրականացնողներին ուղղված Հ. Ֆիրբյուխերի մերկացումները արտացոլում են գտել ամբողջ արևմտաեվրոպական հանրությանը հայտնի նրա խաղաղասիրական ելույթներում, 1920-1930-ական թթ. հրապարակած հոդվածներում՝ և հատկապես 1930 թ. լույս տեսած նրա «Հայաստան 1915» գրքում<sup>2</sup>, որը Գերմանիայում ունեցավ ևս երկու հրատարակություն (1985 և 1987 թթ.):

Հ. Ֆիրբյուխերի թե՛ բանավոր և թե՛ գրավոր քննադատության գլխավոր զենքը փաստերի և եզրակացությունների վավերականությունն է ու նաև նրա որդեգրած քաղաքական

ուղղվածությունը՝ որպես Արևմտյան Եվրոպայում խաղաղության համար մարտնչողների պարագլուխներից մեկի և մանկուց սոցիալ-դեմոկրատ բանվորի ընտանիքում դաստիարակված անձնավորության: Բնածին հոետոր և խաղաղության պայքարի առաջամարտիկ Հ. Ֆիրբյուխերը չէր կարող անցնել մի ամբողջ ժողովրդի ոչնչացման կողքով, չբացահայտել մարդկության պատմության մեջ, Ռոհրբախի խոսքերով ասած, «ամենամեծ կազմակերպված մարդասպանության» պատճառներն ու մեղավոր-

1 Օրինակ՝ նրա «Արևելքի գոհերը» հոդվածում (Vorwärts, 1920).

2 Heinrich Vierbücher. Armenien 1915. Was die kaiserliche Regierung den deutschen Untertanen verschweigen hat. Die Abschichtung eines Kulturvolkes durch die Türken. Donat Femmen Verlag, Bremen, 1987. Հ. Ֆիրբյուխերի գիրքը 1991 թ. երևանում հրատարակել ենք ուսերին:

ներին: Մի բան ակներև է. հայկական մղձավանջային իրադարձությունների ակնատեսն և խաղաղության մարտիկ Հ. Ֆիրբյուխերը իր սրբազան պարտքն է համարել համաշխարհային հանրությանը իրազեկել իր տեսած ու վերապրած այդ իրադարձությունների մասին: Դա նաև գործողության ուղեցույց էր, որ թելադրվում էր խաղաղության համար պայքարի հրատապ պահանջներով. թուրք հայասպանների մերկացումը պիտի օգներ կանխելու գալիք պատերազմի արհավիրքը:

1915 թ. դառնալով Թուրքիայում իր ռազմակայանը հիմնած գեներալ Լիման Ֆոն Ջանդերսի թարգմանիչն ու համհարզը, Հ. Ֆիրբյուխերը ճակատագրի բերումով դարձավ հայկական ողբերգության ակնատեսը. թարգմանչի պաշտոնը ստիպում էր 1915-1918 թթ. հայտնվել Թուրքիայի տարբեր շրջաններում և անկյուններում, սեփական աչքերով տեսնել հայոց ողջակիզումը և բռնագաղթեցումը:

Մինչև Հ. Ֆիրբյուխերը շատ քչերն էին այնպես բացահայտ ու փաստարկված մերկացնում մեծ տերությունների նենգ և հանցագործ քաղաքականությունը Հայոց եղեռնի հարցում, ինչպես նա: Եվ դա հասկանալի է: Հակաֆաշիստ, ամեն տեսակի չարիքի հակառակորդ Հ. Ֆիրբյուխերին օտար էին նացիոնալիստական սահմանափակումներն ու պանդերմանական-կայզերական հավակնությունները, որոնցից Գերմանիայում չխուսափեցին անգամ դեմոկրատական թևի այնպիսի գործիչներ, որպիսիք էին Նաումանը, էկերը, Թոհրբախը և այլք: Հետագայում Հ. Ֆիրբյուխերն ինքը դարձավ ֆաշիստական հետապնդման զոհ:

Հ. Ֆիրբյուխերի դատավճիռը հատկապես անողոք է Օսմանյան կայսրության կառավարողների, երիտթուրքերի և կայզերական Գերմանիայի կառավարության նկատմամբ. երիտթուրքերը՝ հայոց ցեղասպանության անմիջական կազմակերպիչները և իրականացնողներն են, իսկ Գերմանիայի կայզերական կառավարությունը՝ նրանց հանցակիցն է ու դորձակիցը: Հ. Ֆիրբյուխերը իր այդ դատավճիռը հիմնում է անվիճելի ապացույցների վրա, որոնք ենթակա չեն առարկության: Հ. Ֆիրբյուխերի այս դատավճիռը միաժամանակ լուրջ ապտակ է հայոց ցեղասպանության պատմության արդի թուրք կեղծարարների և Արևմուտքում նրանց գրչակների հասցեին, որոնք այսօր էլ ապարդյուն ճիգեր են թափում հայոց ցեղասպանության մեղքը բարդել հենց իրենց՝ Հայերի վրա, կամ էլ՝ ժխտել հայ ժողովրդի ցեղասպանության ըուռն փաստն իսկ Թուրքիայում: Այս վայ-պատմաբանների և հրապարակախոսների համար դժվար է համախմբվել Հ. Ֆիրբյուխերի քննադատության դեմ. չէ՞ որ Հ. Ֆիրբյուխերը իրադարձությունների սոսկ ակնատեսը չէր, այլ նաև՝ գեներալ Լիման Ֆոն Ջանդերսի՝ 1913-1918 թթ. Թուրքիայում գերմանական զինվորական միսիայի գլխավորի, իսկ 1915-1916 թթ. թուրքական 5-րդ բանակի, այնուհետև՝ 1917-1918 թթ. Պաղեստինում թուրքական զորախմբի հրամանատարի համհարզը և թարգմանիչը: Խոսք ու միջոց չգտնելով առարկելու Հ. Ֆիրբյուխերին, կեղծարարները թե՛ այն օրերին և թե՛ այսօր ստիպված են շրջանցել, «չնկատել» նրա մերկացումները:

Այնինչ Հ. Ֆիրբյուխերը քաջ իրազեկ էր թե՛ Ֆոն Ջանդերսի և թե՛ գերմանական ու թուրքական մյուս զինվորական ու քաղաքացիական անձանց գործերին, ինչպիսին էր, օրինակ, գերմանական մարշալ Ֆոն դեր Հոլցը՝ «թուրքական բանակի հայրը»: Հ. Ֆիրբյուխերի վկայությունները, նույնիսկ Հոլցը չէր դիմացել հայոց կոտորածի սարսափելի տեսարանի առջև և 1915 թ. նոյեմբերի 22-ին Հալեպից հայտնել էր Բեռլին. «Հաջորդ առավոտյան անցանք գլխավոր թունելը և դուրս եկանք Հյուսիսսիրիական ցածրություն: Այստեղ մեր հայացքին ներկայացավ սբտաճմիկ մի տեսարան՝ փախստական հայերը, տեղավորվելով Տավրոսի հարավային ստորոտին, գտնվում էին անսահմանորեն ողորմելի վիճակում... Մի ամբողջ ժողովրդի սարսափելի ողբերգություն: Հագարավոր անպաշտպան

մարդիկ առանց պարենի, առանց մատակարարման ընթանում էին անհայտ նպատակին ընդառաջ: Շատերը մահանում էին ճանապարհին, և նրանց դիակները ընկած էին ճանապարհների եզրերին»<sup>3</sup>:

Եվ իրոք, պանթյուրքիսական ճամբարի այսօրվա կեղծարարները ոչինչ չունեն հակադրելու Հ. Ֆիրբյուլսերին և գերադասում են նրան լուսթյան մատնել: Այդպես նրանք վարվեցին նրա «Արևելքի զոհերը» հոդվածի հետ, որտեղ Հ. Ֆիրբյուլսերը դեռ 1920 թ. բողոքում էր «մարդկային դժոխքի գազանությունների դեմ» և վկայում «հայկական վշտի վտակների մասին, որոնք, սկիզբ առնելով Ստամբուլից, Տրապիզոնից, Միվասից և էրզրումից, վերածվել էին անլուր տառապանքների մի վիթխարի-սարսափելի սիմֆոնիայի»<sup>4</sup>:

Հայոց եղեռնի աղբյուրով Հ. Ֆիրբյուլսերը աներկբայորեն դնում է Գերմանիայի մեղսակցություն հարցը, որը մինչև նա ոչ ոք չէր բարձրացրել, և արդարացիորեն մտրակում գերմանական այն դժբախտ «իրական քաղաքականության» ներքին վիճակը, որի համար նշանակություն ունեին «միայն շոշափելի, միայն թվերով հաշվարկվող առևտրական մարդկայինները, զորամիավորումների և զրահակիրների քանակը, իսկ մարդասիրության պահանջները եթե մեծամիտ ժպիտով մի կողմ չէին էլ նետվում որպես «գաղափարական երազողների ֆանտազիաներ», ապա համարվում էին մի յուրատեսակ զարդարժեք» (էջ 94):

Որպես իսկական դեմոկրատ և սոցիալիստ՝ Հ. Ֆիրբյուլսերը, լինելով առաջինը, հարվածը ուղղել էր սեփական թուրքամուլների դեմ, որոնց թուրքամետ պրոպագանդայի հետևանքով Գերմանիայում ամբողջ պատերազմի ընթացքում ժողովուրդը պարզ պատկերացում չունեց հայոց եղեռնի մեջ «թուրքիայի մասնակցություն մասին: Նախշվում և նկարագրվում էին հեքիաթային պատկերներ: Մեր մամուլը, — դրում է Հ. Ֆիրբյուլսերը, — գրող ամբողջ եղբայրակցությունը ջանում էին բողոքին հույս ներշնչել Ալադինի լապտերի կախարդական ազդեցության մասին: Էնվերին դարձրել էին Ջիգֆրիդ, Թալեսթին՝ Բիսմարկ, և թուրքերը մեզ հրամայում էին որպես մի ժողովուրդ, որը աշխարհաբան առաջին իսկ օրից չի ունեցել այլ կրթոտ ցանկություն, քան կովել գերմանական ժողովրդի կողքին» (էջ 17): Պատռելով գերմանական կեղծ դեմոկրատների՝ Նաումանի, Խոհրբախի, Էկխի դիմակը, Հ. Ֆիրբյուլսերը ցույց էր տալիս, որ իրականում նրանց գովաբանած երիտթուրքերը մարդասպաններ են: «Միայն Ձեմալի հրամանով իրականացրել են այնքան բռնարարքներ, որ դրանց լուկ նկարագրությունը հատորներ կկազմեր», — գրում էր Հ. Ֆիրբյուլսերը (էջ 23):

Հ. Ֆիրբյուլսերը բացահայտում է հայոց եղեռնի իրագործման հնարավորության ակունքները: Նա շեշտում էր, որ երիտթուրքական հեղափոխությունը դա վերնախավային շարժում էր և առաջ բերեց սոսկ իշխանության դիկտատուրա: Նրանում բացակայում էր պայքարը գաղափարի համար, և երիտթուրքերը պայքարում էին ոչ թե հանուն ժողովրդի, այլ հանուն առանձին անձանց իշխելու իրատենչ ցանկություն, և «մի տիրանի փոխարեն եկավ սրճարանային ինտելիգենտների ու սպանների սարսափազդու իշխանությունը... Դա զուտ նացիոնալիստական իշխանություն էր, որտեղ դուները գոցված էին մյուս ազգերի ներկայացուցիչների առաջ, և այսպիսով նախապես կանխվել էր երկրի բնակչության երկու երրորդի հնարավորությունը ազդելու երկրի պատմության վրա» (էջ 23):

<sup>3</sup> Նույն տեղում, էջ 70-71 (այսուհետև գրքից բերվող մեջբերումների էջերը կնշվեն տեքստում, փակագծերի մեջ):

<sup>4</sup> H. V i e r b u c h e r. Opfer des Orients. — Vorwärts, 37 Jg., N 61, 10 August 1920 (Abend-Ausgabe).

Հ. Ֆիրբյուխերը գտնում էր, որ Հայոց եղեռնի իրագործման հնարավորությունը չի կարելի հասկանալ, եթե հետադարձ հայացք չձգվի թուրքական կայսրության զարգացման պատմության վրա: Պատմական փաստերի ներկայացմամբ, Հ. Ֆիրբյուխերը ցույց էր տալիս, որ Հայոց ցեղասպանությունը հնարավոր էր հենց թուրքական կայսրության պայմաններում, կայսրություն, որը իր սարսափներով և հանցագործություններով համաշխարհային պատմության մեջ չուներ իր նմանակը. «Ինություն, բռնություն և դարձյալ բռնություն,- ահա թուրքական պատմության նշանարանը: Չի կարելի արդյոք նույնը ասել նաև մյուս ժողովուրդների պատմության վերաբերյալ: Հարկավ, կարելի է, բայց աշխարհի և ոչ մի երկրում քայքայիչ ուժը այդչափ բացահայտ չի գործել, սուրը այդչափ չի ճզմել ժողովրդի հոգեոր, ստեղծագործ ուժերին, ինչպես թուրքիայում: 200 մեծ վեզիրներից 76-ը մահացել են ոչ բնական մահով:

Այն օրվանից, երբ Չինգիզ խանի հորդան, իր առջևից քշելով Սուլեյմանի թուրքական փոքրիկ ուժակը հարկադրեց նրանց հանգրվանել Անատոլիայում, թուրքերը իրենց ապրուստը վաստակում էին միայն սրով: Նրանք դարձան սելջուկների վարձկանները, շուտով գրավեցին նրանց պետությունը, քանդեցին հիասքանչ կառույցները... 1632 թ. թուրքերը կողոպտեցին Ֆրանսիական նավը: Ֆրանսիական դեսպանորդը իր թարգմանչի միջոցով բողոք հայտնեց սուլթանին: Եվ ի՞նչ արեց սուլթանը: Մուրադ IV-ը, որը հայտնի է որպես լավագույն սուլթաններից մեկը, հրամայեց անմիջապես դժբախտ դեսպանորդին նստեցնել ցցի վրա... Դեռևս հարյուր տարի առաջ հունական սոցատադրական պայքարի ժամանակ, նրանք (թուրքական իշխանությունները - Վ. Մ.) հրամայեցին խիստ կղզում և Պերայում սրի քաշել 50.000 տղամարդկանց, կանանց և երեխաների, իսկ 50.000 էլ վաճառեցին ստրկության: Դելակրուան այդ իրադարձությունները պատկերել է կտավի վրա, որը գտնվում է Լուվրում: Վերջին տասնամյակների հայերի կոտորածները գնալով ավելի հաճախ և սարսափելի էին դառնում: Մեր ժամանակներում Աբդուլ-Համիդի կատաղած սարսափելի գործողությունների մասին արդեն որոշ բան ասվել է: Բայց թուրքական պատմության մեջ կատարված բոլոր գազանությունների դաժանակետը 1915 թ. Կովկասում (Արևմտյան Հայաստանում - Վ. Մ.) կատարված զանգվածային կոտորածն է» (էջ 25, 31):

Թուրքական պատմության մեջ Հայոց եղեռնի իրագործման համար ստեղծված բարենպաստ մթնոլորտի բացահայտումը ինքնանպատակ չէր: Հ. Ֆիրբյուխերը մոռացության չէր տալիս նաև թուրք ժողովրդին որպես եղեռնի իրագործող հիմնական գործոնի: «Թուրք ժողովուրդը լայն իմաստով ոչ կոլտուրական ժողովուրդ է... Թուրքական գրականության մասին խոսք իսկ լինել չի կարող... Թուրքերը երբեք չեն ունեցել իրենց ճարտարագետությունը... Գիտության համար թուրքական հողում տեղ չկա... Բայց թուրքիան պատերազմ վարելու, պատերազմի և կրկին պատերազմի վարպետ է: Պատերազմների թվով թուրքիան աշխարհում նվաճել է առաջնության դասին: Էֆենդիները ակտիվորեն գործել են այնտեղ, որտեղ կռանժարի վրա գրված են եղել բռնուցքը, սարսափը, քանդելու ծարավը, բայց ոչ երբեք խելքն ու գաղափարները: Ամոթ Գերմանիային, որ գարձել էր մագերը եվրոպաձև կնտած հանցագործների բանգայի դաշնակիցը, որոնք հենց միայն սպասում էին հարմար պահի, որպեսզի իրագործեն համաշխարհային պատմության մեջ ամենամեծ կողոպուտը և մասսայական մարդասպանությունները» (էջ 31): Մենք հատուկ ընդգծեցինք մեծ հուժանիստ Հ. Ֆիրբյուխերի այս խոսքերը ցույց տալու համար, որ, իրոք, հայասեր գերմանացիներից ոչ ոք այդպես անարգանքի սյունին չի գամել սեփական կառավարությանը, ինչպես նա:

Հ. Ֆիրբյուխերը իսկական գերմանացի-պատրիոտ է, և հենց այդ պատճառով էլ նա չի խնայում նաև «սեփական» բռնակալներին, որպեսզի

հանուն արդարության հաղթանակի իր ժողովրդին ևս ազատագրի «թագակիր տականքներից»: Նրա իրավացի պնդմամբ ամեն մի ժողովուրդ էլ ունի «իր թագակիր տականքները», բայց «օսմանների մոտ կարելի է գտնել իշխանության գլխին կանգնած և ժողովրդի դեմ հրահրված մի ամբողջ շարք խելագարներ, հանցագործներ և անառակներ» (էջ 29):

Հիմնովին իրազեկված մարդու իրավունքով Հ. Ֆիրրյուխերը մերկացնում էր Թուրքիայի նկատմամբ կայդերական Գերմանիայի վարած քաղաքականության կարճատեսությունն ու անհեռատեսությունը, ցույց տալով, որ բոլոր կողմերով երիտթուրքերը նույն մարդասպան «հին թուրքերի ժառանգորդներն են»: Հարկավ, ճիշտ էր Հ. Ֆիրրյուխերը, երբ պնդում էր, թե պատերազմի ժամանակ Թուրքիայում ապրող ոչ բոլոր գերմանացիներն էին թուրքոֆիլ դարձել: Այս աղերսով նա նկատում էր, թե «բավական էր գննել էֆենդու կեղծավոր դիմակը, լսել այն, թե ինչ էին խոսում մարդիկ, տեսնել, թե ինչպես էին մեզ խաբուսում և կողոպտում ամեն մի քայլափոխի հասկանալու համար, որ մենք պարոնայք թալեթի և էնվերի համար եղել ենք սոսկ իրենց և իրենց կլիկի հաշվենկատ նպատակին հասնելու միջոց» (էջ 30):

Հ. Ֆիրրյուխերը անկեղծորեն ափսոսանք էր հայտնում, որ երիտթուրքերի երեսապաշտ դեմքը չէին նկատել նաև հայ գործիչները, որոնք պետք է, որ գերմանացիներից ավելի լավ ճանաչեին նրանց: Այս հարցի շիտակ քննությունը թողնելով հետագայի, չենք կարող, սակայն, այս առիթով չըբերել երևույթին տված Հ. Ֆիրրյուխերի հստակ գնահատականը. «երբ այսօր հետադարձ հայացք ես ձգում և վերլուծում այն դեպքերը, ապա հայ գործիչները թվում են այն մարդկանց հանդեպ տածած նվիրվածության և հավատի զոհեր, որոնք շուտով ցույց տվեցին իրենց իսկական դեմքը... Երիտթուրքերը ունեին հատուկ նպատակներ: Եվ նրանք ձեռնամուխ եղան գործի: Նրանք 1915 թ. սառնասրտորեն սպանեցին իրենց հայ բարեկամներին, որոնք 1909 թ. փրկել էին նրանց կյանքը» (էջ 42):

Հ. Ֆիրրյուխերը թողել է հայոց ցեղասպանության սահմուկեցուցիչ իրադարձությունների իրապատում նկարագրությունը: Անժխտելի փաստերի հիման վրա, նաև փաստաթղթերի օգտագործմամբ, Հ. Ֆիրրյուխերը ապացուցում է, որ հայոց ցեղասպանությունը Թուրքիայում պետական մակարդակով կազմակերպված, երիտթուրքական կառավարության հրամանով իրականացված միջոցառում էր: «1915 թ. ապրիլի 21-ին, — հավաստում է Հ. Ֆիրրյուխերը, — թուրքական կառավարությունը հրաման արձակեց հայ ժողովրդի ընաջնջման մասին և համապատասխան հրամաններ ստացան զինվորական և քաղաքացիական գերատեսչությունները: Թալեթն ու էնվերը հաղթանակ տարան վեհերոտ մեծ վեզիրի՝ եղիպտական արքայազն Սեիդ Հալիլի նկատմամբ» (էջ 50):

Հ. Ֆիրրյուխերի պատկերավոր դիտարկմամբ՝ ապրիլյան չարագուշակ հրամանից հետո «հայոց արյան առվակները սկսեցին հոսել ժայռերով մեկ և խառնվեցին բուռն ալիքների հետ»: Բայց սարսափի փոթորիկը «չանցավ սոսկ Ատամբուլի պերճ ալգիների ճոխ սեղանների վրայով, որտեղ գերմանացի և թուրք դաշնակիցները խմում էին մեկը մյուսի կենացը»: Հ. Ֆիրրյուխերի խստագույն դիտարկմամբ չգտնվեց գերմանացի և ոչ մի պետական գործիչ, «որպեսզի Բոսֆորի իր գործընկերների երեսին չպրտեր, թե նրանք չարագործ ճիվաղներ են, որոնց հարկավոր է շղթայակապել»: Միաժամանակ Հ. Ֆիրրյուխերը հեզնորեն նշում է, թե այդ ճիվաղների «խիղճը հանգիստ էր», քանի որ նրանց թիկունքում գերմանական կառավարությունն էր, որի մասին Հ. Ֆիրրյուխերի դատավճիռը անողոք է ու մեկին. «բոլոր հիմարություններին և հանցագործություններին զուգընթաց, որ կատարել են Վիլհելմ II-ը, գիվանադիտությունը և զինվորական ղեկավարությունը, վիթխարի պատերազմին զուգընթաց, որ իրենց

վրա էին բեռնել գերմանացի Հերոստրատները, գերմանական ռազմական կառավարությունը կիսում է նաև պատասխանատվությունը 1915 թվականի ստոր հանցագործության համար» (էջ 75-76):

Հենց այդպես անկեղծ և ուղղակի Հ. Ֆիրբյուխերը մեղադրում էր սեփական կառավարությանը, մի եզրակացություն, որը չէր համարձակվել անել անգամ մեծ հայասեր և հումանիստ Լեպսիուսը, մինչդեռ Հ. Ֆիրբյուխերը դա անում էր այն էլ վերահաս Փաշիստական վտանգին ընդառաջ, վտանգ, որի զոհը 1939 թ. դարձավ նաև ինքը:

## ՀԱՅՆՐԻԽ ՖԻՐԲՅՈՒԽԵՐ

### ՍԱՏԱՆԱՅԻ ԿԻՐՃԸ\*

Տրապիզոնի և Էրզրումի վիլայեթներից բռնազաղթեցված հայերին Եփրատի Հովտով քչեցին մինչև Կամախի (Քեմախի) կիրճը: Դա լեռներում ընկած անդնդախոր, ուղղաձիգ մի կանյոն է, ուր դետը վերածվում է այլեկոծ խառնարանի: Այն, ինչ այստեղ կատարվեց հազարավոր մարդկանց հետ, իրենից ներկայացնում է դաժանության և վայրենության այնպիսի մի պատկեր, որ, թվում է, թե դարձյալ ի մի է կուտակվել հազարամյակների խելահեղությունը և բարձրացել այս մի կտոր անիծյալ հողի վրա, որպեսզի վիթխարի մի հրեշի կերպարանքով հաղթականորեն ըզզվի հունիսյան առեկայծող արևին ի տես, թե ողջ քաղաքակրթությունը դա սոսկ միայն շղարչ է, որը ամեն օր կարող է պատուվել երկոտանի ճիվաղի դաժանություններով:

Գրող Ֆ. Ռ. Նորդը իր «Սիրանուլյ» վեպում (գերմանական հրատարակությունը Շտուտգարտ) տվել է Կամախում կատարված գազանությունների պատկերը, որը ավելի շուտ կարելի է համարել գրողի հրեշավոր երեակայություն անիմաստ պտուղ, քան թե իրական դեպքերի պատկերում: Է. Ա. Պոյի և Ե. Տ. Հոֆմանի նկարագրած սարսափները նսեմանում են այն բանի առաջ, ինչ տեղի ունեցավ Վիլհելմ II-ի դաշնակիցների մոտ 1915 թ.:

Հունիսի 8-ին, 9-ին և 10-ին հայ զանգվածները թողեցին Երզնկան՝ զինվորական պահակազորի ուղեկցությամբ, որը պետք է ապահովեր այն փոխադրամիջոցի ապահովությունը, որ կազմված էր հետիոտն մարդկանցից և եզների հարյուրավոր սայլերից: Նրանք ընթանում էին դեպի Կամախ՝ հաջորդ օկրուդային քաղաքը: Տասնյակ հազարավոր աքսորյալ հայերի միայն աննշան մասը հասավ նշանակման վայրը: Անպաշտպան մարդիկ կիրճում ենթարկվեցին զինվորների և արյունարբու քրդերի հարձակմանը, կողոպտվեցին, ապա սրի քաշվեցին արյունահեղ գրոհի ժամանակ: Խրխնջացող ճիվաղների վայրենի գոռում-գոչյունի տակ բացատարած անդունդն էին նետում կիսամեռ մարդկանց և դիակների կույտեր: Ջարդուփշուր արված մարդկային մարմինների շառաչը կրկին ու կրկին արձագանքվում էր միախառնվելով վերևում մահասկզբի հոգեվարքի մեջ գալարվող խելակորույս տնքոցներին: Տղամարդկանց և կանանց աչքի առաջ անդամահատում և կտոր-կտոր էին անում նրանց երեխաներին և մերձավորներին, նրանց արյունաքամվող մարմինները ջարդուփշուր էին անում ժայռերի ելուստներին խփելով: Դժոխքի ուրվականի առաջ խելքը կորցրած մայրերն ու կանայք իրենց երեխաների ու ամուսինների հետևից նետվում էին մահվան անդունդը: Հուսահատված մարդկային էակները

\* Հատված Հ. Ֆիրբյուխերի "Armenien 1915" գրքից (էջ 56-60):

արյան մեջ թրջված ճիվաղների առաջ ծնկաչոք էին գալիս և աղոթում որքան կարելի է շուտ սպանել իրենց: Ուրիշները կարեկցութուն էին աղերսում կամ իրենք էին իրենց երեխաներին նետում գետը, որի առափնյա ելուստների մոտ դիակները պատնեշներ էին առաջացրել: Վայր ընկնող մեռյալ մարմինները մխրճվում էին արագընթաց ալիքների մեջ: Եվ դժոխային այդ աշխատանքը տևեց ոչ թե մեկ, ոչ թե երկու ժամ, այլ՝ երեք օր անընդմեջ: Մարդկանց խեղդամահ անելն ու մորթոտելը շարունակվեց երեք օր անընդհատ: Արյան առվակները դանդաղ հոսում էին ժայռերն ի վար և խառնվում մոլեգին ալիքներին: Երեք օր... Եվ արևի խավարում տեղի չունեցավ, և սարսափի փոթորիկը չանցավ սոսկ Ստամբուլի ճոխ այգիների սեղանների վրայով, որտեղ գերմանացի և թուրք զաչնակիցները խմում էին մեկը մյուսի կենացը: մշտամնա Հաճախորդների սեղանի շուրջը, որտեղ ֆիլիստերների երևակայության մեջ ուրվագծվում էին արևելյան թովիչ պատկերներ, նրանց ալկոհոլային կեղծ երագանքը չէր ցրում սպանված երեխայի հոգեվարքի ճիչը: Մի թե գերմանական ոչ մի պետական գործիչ չէր կասկածում, որ ինչ-որ բան այնպես չէ, որպեսզի Բոսֆորի իր գործընկերների երեսին չպրտեր, թե նրանք չարագործ ճիվաղներ են, որոնց հարկավոր է շղթայակապել: Նրանց խիղճը հանգիստ էր: Վիլհելմ II-ի դեսպանը մայիսի 31-ին զեկուցում էր Բեռլին, թե «նշված ձեռնարկումները (Հայերի ցեղասպանությունը — Վ. Մ.) թուրքերիսյում տիրող քաղաքական և ռազմական դրուժյան պայմաններում, ցավոք սրտի, անհնարին է կանխել»: Հիանալի մի բառ է այդ «ցավոք սրտին»:

Երեք օր: Եփրատի կուլ տված մարդկանց իրեղենները տարան անտեր մնացած սայլերով: Եվ միայն չորրորդ օրը Կամախ ուղարկվեց 86-րդ Հեծելազորային ջոկատը «պատժելու համար» արյունարբու քրեներին: Այդ «ազնվաբարո» ջոկատը հզրափակեց արյունոտ աշխատանքը՝ որի քաշելով այն միջանիսին, որոնք զեռ կենդանի էին մնացել: Սարալանջերն ու ժայռերը ծածկվել էին ուռչած դիակներով, որոնք օդում տարածել էին գարշահոտություն: Երզնկայից եկած երկու բուժքույր պատմում էին մի ժանդարմի մասին, որը պարծենում էր, թե ամեն օր սպանում էր տաստասներկու տղամարդկանց և նետում գետը: Այն երեխաներին, որոնք չէին կարող փախչել, փչրում էին գանգերը: Ծանապարհին ընկած գյուղերում կանանց կրկին բռնաբարում էին: Այնուհետև ասվում էր.

«Հաջորդ օրը, վաղորդյան, մենք լսեցինք մահվան դատապարտվածների աղմուկ-աղաղակը... Աննկարագրելի մի վայնասուն: Դա մարդկանց մի մեծ հոտ էր: Շատերը գոռգոռում էին «փրկեցեք մեզ, մենք ուզում են մահամեղական դառնալ կամ գերմանացի, որը կամենաք, միայն թե փրկեցեք մեզ: Այժմ նրանք մեզ կքշեն Կամախ և կկտրեն մեր գլուխները...»: Քաղաքին մոտենալիս մենք տեսանք, թե ինչպես շատ թուրքեր պլանում էին ձիերով և որսում երեխաներ ու երիտասարդ աղջիկներ: Քաղաքի մուտքի մոտ, որտեղ գտնվում էին նաև գերմանացի բժիշկների բնակարանները, հոտը, նախքան դեպի Կամախ շարժվելը, մի ակնթարթ կանգնեց: Այստեղ ստրուկների իսկական մի շուկա էր, միայն լոկ այն տարբերությունը, որ նրանց դիմաց ոչինչ չէին վճարում: Մայրերը կամովին հանձնում էին իրենց երեխաներին, և ոչ մի դիմադրություն չէր կարող լինել»:

Երբ հունիսի 21-ին գթության քույրերը թողել էին Երզնկան, ճանապարհին նրանք տեսել էին աքսորվածների բազում տառապանքները: Բռնագաղթեցվածները լռակյաց առաջ էին գնում, մեծերն ու փոքրերը, անգամ զառամյալ պառավները, որոնք իրենց հազիվ էին պահում ավանակների վրա, գնում էին, որպեսզի հետո, մեկը մյուսին կապված, բարձր ժայռերից նետված լինեն Եփրատի ալիքների մեջ, անեծքի այն հովտում, որը կոչվում է Քեմախ-Բողազի: Մի հուլյն կառապան մեզ պատմեց, թե

ինչպես էին դա անում: Մարդու սիրտը սառուլոց էր կտրում նրա պատմածից: Մեր ժանդարմը պատմում էր, որ նա ինքը 3000 կանանցից և երեխաներից կազմված այդպիսի քարավաններից մեկը Մամախաթունից ընկել է Կամախ: «Her gitdi bıldı - բոլորին ոչնչացրինք», - ասաց նա: Մենք հարցրեցինք «Եթե դուք ուզում էիք նրանց սպանել, ինչո՞ւ դա չեք արել դյուզբերում: Էլ ինչո՞ւ նախապես նրանց հասցրել եք այդպիսի աննկարագրելի ստորացուցիչ վիճակի»: «Այդ դեպքում ի՞նչ պիտի անեինք դիակների հետ, նրանք դարչահոտություն կտարածեին», - եղավ նրա պատասխանը:

Մի պահ կանգ առնենք: Հազար տարի առաջ բուլղարասպան վասիլ II-ը հրամայեց 15000 մարդկանց աչքերը հանել: Հարյուր հիսուն մարդու թողնեցին մեկ աչքը, որպեսզի նրանք կարողանան իրենց լիովին անօգնական եղբայրներին վերադարձնել բուլղարական ցար Սիմեոնի մոտ: Ասում են, թե 978 թ. ոուս իշխան Սվյատոսլավը հրամայել է 40.000 մարդկանց Ադրիանոպոլսի մոտ քաշել ցցի վրա: Սպարտակի հազարավոր ապստամբների գամել էին խաչի: Տիտոսը սարսափելի վայրագություններ արեց Երուսաղեմում: Գերմանական կոմսերը դաժան վրեժ լուծեցին պարտված գյուղացիներից Ֆրանկենհաուզենի արյունոտ դաշտում: Բայց դրանք անզի էին ունեցել 2000, 1000, 400 տարի առաջ: Դա հաղթողի կողմից վրեժի լուծում էր պարտվածից, դա հաշվեհարդար էր դաժան պատերազմի ժամանակ: Եթե հաղթեր մյուս կողմը, թերևս նա ևս այդպես կվարվեր: Դրանք պատերազմական ժամանակներ էին, երբ մարդը «ինչ-որ մի բան արժեք», թեև արժեք այնքան, որպեսզի դառնար մարդասպան կամ սպանվեր: Մարդը պատերազմի ծառան էր, զինվորը, հպատակը, հայրենիքի պաշտպանը՝ մարդ էր: Բայց մի ամբողջ ժողովրդի ոչնչացումը՝ դիտակցարար, կանանց ու երեխաներին սրի քաշելով հանդերձ, այդպիսի բարձունքի բարրարոս անցյալը թերևս նույնիսկ չէր էլ «հասունացել»: Պետք է հիշել Պերուում Պիցարոյի կատարած չարագործությունները, սպիտակների մահաչառնչ պատերազմը կարմրամորթների դեմ, «քրիստոնյա» անգլիացիների կատարած «մարդաորսը» Տասմանիայում, Նոր Զելանդիայում, նրանց բարրարոսությունները անդլո-բուրական պատերազմում, հերերներին գերմանացիների կողմից հետապնդելու ժամանակ ծարավով սպանելը, որպեսզի կարելի լինի պատկերացնել, թե ինչ է կատարվել Կամախում 1915 թ.: Շարունակվում են փորձեր կատարվել դա բացատրելու արյունարբության ընչաքաղցության, կրոնական ատելության, իշխանատենչության և հիմարության գործոններով: Եվ, այնուհանդերձ, այնքան շատ է անըմբռնելին, որ թվում է 1915 թ. ողբերգությունը մարդկության պատմության ամենաարյունալի և սահմուկեցուցիչ հանելուկն է: Անվորական խելքի համար այն մնում է որպես անլուծելի խնդիր, և հենց դա է անտանելին:

\* Այդպես է տեքստում: